

Februari 1

Nautoa Moyo Wangu

Mwanangu, nipe moyo wako; Macho yako yapendezwe na njia zangu—
Mithali 23:26.

Bwana anamwambia kila mmoja wenu, “Mwanangu, nipe moyo wako.” Anaona mapungufu yako. Anajua kwamba roho yako ina ugonjwa wa dhambi na Anatamani kukuambia, “Umesamehewa dhambi zako.” Tabibu Mkuu anayo tiba ya kila ugonjwa. Anaielewa haja yako. Chochote kile ambacho kinaweza kuwa makosa yako, Yeye anajua jinsi ya kukabiliana nacho. Je, unaweza kuweka tumaini lako Kwake?

Baraka za Mungu zitakuwa juu ya kila mtu anayejisalimisha kikamilifu Kwake. Tunapomtafuta Mungu kwa moyo wote, tutampata. Mungu anatupenda sana na anataka tufanye kazi kwa bidii kwa ajili ya umilele. Ameitoa mbingu yote kupitia zawadi moja na hakuna sababu ya kwa nini tutilie shaka upendo Wake. Mtazame Yesu pale Kalwari....

Mungu anakusihia umpatie moyo Wako. Uwezo wako, talanta zako na mapenzi yako, yote yanapaswa kusalimishwa Kwake, ili aweze kufanya kazi ndani yako kutaka kwako na kutenda kwako, kwa kulitimiza kusudi Lake jema na kukufanya kufaa kwa ajili ya uzima wa milele.

Yesu anapokaa moyoni, nafsi itajazwa na upendo Wake, kwa furaha ya kujumuika pamoja Naye, kiasi kwamba itashikamana Naye; na katika kumtafakari, nafsi itasahaulika. Kumpenda Yesu kutakuwa chemchemi ya utendaji. Wale wanaouhisi upendo wa Mungu ubidishao, hawaulizi ni kiasi gani kinaweza kutolewa ili kukidhi mahitaji ya Mungu; hawaombi viwango vya chini kabisa, bali wanalenga kupatana kikamilifu na mapenzi ya Mkombozi wao. Kwa shauku ya kina wanatoa yote na kudhihirisha upendo upatanao na thamani wa Yule wamtafutaye.

Ni roho ya kujisalimisha, ifundishikayo ambayo Mungu anaitaka. Kile ambacho huyapatia maombi ubora wake ni ukweli kwamba hutoka kwenye moyo mwema na mtiifu.